

# Kampani bilong Itali laik kamapim wok

Andrew Molen i raitim

OL pipia bilong Papua Niugini olsem skin bilong kokonas na ol haphap diwai ken helpim kantri long kamapim wok na bikpela bisnis.

Wanpela kampani bilong kantri Itali i laik mekim dispela long kantri na nau yet ol i lukluk raun ples.

"Besenzoni Companies" i bung pinis wantaim Praim Minista, Gren Sif Sir Michael Somare we ol i tokaut long laik bilong ol long kamapim sampela wok insait long kantri.

Wok bilong ol bai lukluk long kisim ol pipia olsem skin bilong kokonas na haphap diwai na yusim ol long mekim eneji o kain samting olsem ges na pawa na ol arapela samting gutpela samting.

Man i makim Itali long PNG o Honareri konsul, George Marama husat o tanim tok bilong ol bikman bilong kampani i tok ol i gat bikpela laik long kamapim wok hia long PNG na ol i laikim tasol tok orait bilong Sir Michael.

"Dispela grup i gat wanpela tingting tasol long i kam long hia, ol i laik givim save bilong ol long kamapim ol gutpela prodak bilong PNG we PNG i ken salim i

## ....Yusim pipia bilong kokonas na diwai

go ovasis," Mista Marama i tok.

Em i tok ol bai statim wok nau na 10 o 15 yia bihain taim olgeta samting i redi bai ikonomi bilong kantri ken sanap strong wantaim dispela invesmen.

Dispela kampani nau bai fes bilong wanpela kantri insait long 'European Union (EU)' long kamapim wok long PNG.

"Ating yupela i save harim ol narapela EU kantri tok ol i laik invest long hia tasol ol i no save mekim, Mipela bai mekim wok pastaim na toktok bihain," Mista Marama i tok.

Mista Marama i tok ol i laik stap insait long 5 yia plen bilong PNG.

"Mipela bai yusim wanem samting ol narapela i les long en long mekim eneji," Mista Marama i tok.

"Mipela bai yusim ol samting olsem skin bilong kokonas na ol narapela pipia long kamapim eneji bilong ol pawa stesen we i no save yusim oil, ges na ol narapela samting we i save bagarapim ples.

"Wanem samting ol i save tromoi na sting nating long graun, em bai mipela i yusim tasol mipela i laikim sapot bilong gavman," Mista Marama i tok.

Em i tok dispela bai kamapim tu wok bilong ol lain i stap long ples.

Papa bilong kampani, Giancarlo Besenzoni i tok ol i tingting long ol yangpela manmeri na ol i laik kamapim samting we bai ken helpim ol long bihain taim.

"Mipela i no kam hia long wok na helpim tasol, mipela i laikim tu tingting bilong yupela long wanem kain wok mipela i mekim," Mista Besenzoni i tok.

"Kala bilong skin na bilip bilong lotu namel long PNG na Italy i wankain na mipela i amamas long kisim helpim long yu (PM)," em i tok.

Sir Michael i dispela em i fes taim long lukim ol pipol bilong EU i kam na kantri bai givim olgeta sapot long wok bilong ol.

"Dispela em i fes taim bilong wanpela investa grup long kam na wanem ol grup i laik kam invest long kantri i mas kam tasol," em i tok.

"Mipela i stap long taim we mi laik lukim planti senis i kamap long kantri.

"Bihain long 30-pela yia mi laikim bai ol pipol i mas amamas," Sir Michael i tok.